

辽

文

通

文

遼文存卷五

序

釋摩訶衍論通玄鈔引文

道宗

朕聞如來啟運具四智以流徽聖教談微應三乘而導物自結集之後逮傳布以還不有聖賢疇能啟迪故馬鳴大士卽其人也夙證十身之果示居八地之因將庠邪宗紹隆正法著一百部論釋百億契經或華文以立名或攝義以爲目維起信論可得而稱焉辭簡而邃理該而通派五分之捐歸闢二門之蘊奧實一代之靈編也次有菩薩號曰龍樹思報師恩廣宣論意造釋論十卷行於世其義顯燦兮若三辰之麗天咸覩其光彩其言博浩乎如四溟之紀地莫測其涯涘暨乎蘭陀筏提之輩譯之於前法藏元曉之師疏之於後或興或墜厯于數朝朕聽政之餘留心釋典故於茲論尤切探賾今東山崇仙寺沙門志福業傳鷲嶺德茂鵬聳迺謂斯文獨善諸教囊括妙趣樞要實乘期在宣揚且資贊述繇是尋

原討本博採菁義勒成釋摩訶衍論鈔四卷爰削章而陳達欲鏤板以傳通虔瀝懇悰願爲標引勉俞所請聊筆其由仍以通(玄)二字爲題云爾

釋摩訶衍論通(玄)鈔序

釋摩訶衍論贊(玄)疏序

沙門法悟

夫圓常果海湛寂靈源離教說以難思超因緣而最勝四法界詎能含攝三世間奚足該收透門法之兩重迴絕能所像希夷而獨立莫得詮緣不可智知非其數數者其惟不二摩訶衍歟冲虛本一炳煥隨宜爲無爲始異從生世出世畢同歸趣號如意珠藏俾應用以無窮名廣大神王況威靈而不測者則十六所入法之謂焉真俗有辨頓漸無叅自他對待以區分體相寂絕而清淨位殊因果智惑假立於斷修性出名言障道不存於遣立者卽十六能入門之謂矣故我世尊順本所乘如義而說自鶴林條變且失指提龍藏甚深罔窮幽祕馬鳴菩薩慨茲(玄)理匿在筌蹄蠢厥含靈懵於修證由是迹滿二僧祇劫寄逮無功文(玄)百洛又經具彰總

法摩訶衍論自此興焉字纔啻於萬言旨備包於眾典權輿果道
隱括因門然法教淵含奈根宜淺局故於了義未達幽宗其猶管
眼窺天粗觀寥廓毛頭滴海安測深弘龍樹大士膺記別以挺生
導物情而示現以爲攝義之論正投樂畧之根乃依百本之金言
廣釋一軸之寶冊師資繼作本末流芳而自譯出後秦時經累業
其間闡布未之前聞噫歷世久湮必將有待會逢外護果視中興
我天佑皇帝傳刹利之華宗嗣輪王之寶系每餘庶政止味玄風
陞御座以談微光流異瑞窮圓宗而製讚神告休徵然備究於羣
經而尤精於此論法悟疊承中詔侍講內庭凡粗見於義門幸仰
符於睿意因茲諸釋特瀝懇詞欲別製於疏文期載揚於論旨暨
達聖聽爰降前音且揮塵傳燈無足稱者而操觚染翰何敢當哉
勉副宸衷聊述鄙見云爾

同上

釋摩訶衍論贊玄疏引文

耶律孝傑

臣聞覺皇之立教也權輿六度弘正道以流徽軌轍三乘應羣生

而示化經言無際彌天地之表不可窮法意甚深極江海之量不能測矣自結集之後洎于傳布已還縣厯歲時孰能恢闡粵有菩薩名曰馬鳴以十身證果之身處八地示因之地張皇正教破逐邪宗製起信之論文契如來之言教次有龍樹大士仰追師德嗣作主盟據五分之精微裁十軸之奧妙號曰釋摩訶衍論斯乃佛生等有門法對開含總別之深詮具能所之玄旨自震旦流通而後洎摩多傳譯已還聖喆未逢清微曷啟我天佑皇帝位聯八葉德冠百主睿智日新鴻慈天賦儒書備覽優通治要之精釋典咸窮雅尚性宗之妙嘗謂曰釋摩訶衍論者包一乘之妙趣括百部之玄關安得宗師繼爲義疏守司空詮圖進法大師學踰觀肇辯奪生融屢陪內殿之談深副中宸之旨會因眾請獲達聰聞旋特降于俞音俾廣求于隱義由是精滌慧器密淬詞鋒研精甫僅于十旬析理遂成于五卷適當進奏果見褒稱乃賜號曰贊玄疏皇上聽政之餘省方之際厯刊詳而在手咸印證以經心于此論中

先立御解四道皆識透前古信結後人眾耳所未聞凡情所不造
天才獨秀物議同歸如大霧之指南若羣星而拱北義攝于五十
一藏究之無窮理分于三十三端牢不可破詔從模鑲言使傳通
目龜鏡以長存同日星而永照臣恭承溫綽俾贊寶編燦燦義天
管窺而莫際汪汪學海蠡酌以徒煩退讓靡遑聊述梗概云爾

釋摩

訶演論贊
之疏序

龍龕手鑑序

沙智光

夫聲明著論乃印度之宏綱觀跡成書實支那之令躅印度則始
標天語厥號梵文載彼貫線之花綴以多羅之葉開之以字緣字
界分之以男聲女聲支那則創自軒轅制於沮誦代結繩於既往
成進牘以相沿辨之以會意象形審之以指事轉注洎乎史籀變
古文爲大篆程邈變小篆爲隸書蔡邕刊定於石經東晉網羅於
竹簡九流競驚若百谷之朝宗七畧遐分比眾星之拱極尋源討
本備載於埤蒼廣蒼叶律諧聲咸究於韻英韻譜專門則字統說

文開牖則方言國語字學於是昭矣矧復釋氏之教演於印度澤布支那轉梵及唐雖匪差於性相披教悟理而必正於名言名言不正則性相之義差性相之義差則修斷之路阻矣故祇園高士探學海洪源準的先儒導引後進揮以寶燭啟以隨函郭彞但顯於人名香嚴惟標於寺號流傳歲久鈔寫時訛寡聞則莫曉是非博古則徒懷惋歎不逢敏達孰爲編修有行均上人字廣濟俗姓于氏派演青齊雲飛燕晉善於音韻閑於字書覩香嚴之不精寓金河而載緝九仞功績五變炎涼具辨宮商細分喉齒計二萬六千四百三十餘字注一十六萬三千一百七十餘字并注總一十八萬九千六百一十餘字無勞避席坐奉師資詎假擔簦立祛疑滯沙門智光利非切玉分忝斷金辱彼告成見命序引推讓而甯容閣筆俯仰而強爲抽毫矧以新音徧於龍龕猶手持於鸞鏡形容斯鑒妍醜是分故目之曰龍龕手鑑總四卷以平上去入爲次隨部復用列之又撰五音圖式附於後庶力半功倍垂益於無窮

者矣時統和十五年七月一日癸亥序燕臺憫忠寺沙門智光字
法炬撰

焚椒錄序

王鼎

鼎於咸太之際方侍禁近會有懿德皇后之變一時南北面官悉
以異說赴權互爲證足遂使懿德蒙被淫醜不可湔浣嗟嗟大墨
蔽天白日不照其能戶說以相白乎鼎婦乳媪之女蒙哥爲耶律
乙辛寵婢知其奸搆最詳而蕭司徒復爲鼎道其始末更有加於
姬者因相與執手歎其冤誣至爲涕淫淫下也觀變以來忽復數
載頃以待罪可敦城去鄉數千里視日如歲觸景興懷舊感來集
乃直書其事用俟後之良史若夫少海翻波變爲險陸則有司徒
公之實錄在大安五年春三月前觀書殿學士臣王鼎謹序

北遼遺事序

遼國自阿保機創業於其初德光恢廓於其後吞并諸蕃割據漢
界南北開疆五千里東西四千里戎器之備戰馬之多前古未有

子孫繼統二百三十餘年迨至天祚失御女眞稱兵十三年間舉國土崩古人謂得之難失之易非虛言也

郡齋讀書志

星命總括自序

耶律純

大遼統和二年翰林學士耶律純以議地界事奉國書使於高麗遼東至其國頗聞國師精於星躔之學具重幣設威儀求見屢請不從一日自請於高麗國王曰臣奉國書來此稔聞國師富於道德星命之學願借玉音得遂一見以請所學何異昌黎之遇大顛也國王遂命一見既見之後往復數四前請曰微生跼伏北方聞國師深於星命之度今日天幸得瞻豪相願從師畧聞一二以聳北方之學者亦是三生夙昔之幸不知可乎國師曰何不可之有但學士平生論學有何所得吾與學士從長商榷而已何以師爲曰膚學得於生剋制化之外亦有十條以前六條看根本後四條看流年其一曰太歲尊神加臨管攝其二曰無中有曜弱處高強其三曰得經失次細辨盈虛其四曰身傍母吉傍鬼者凶其五曰

同宮千里異宮尺寸其六曰黨母福多藏鬼禍大其七曰元守雖
詳流年尤急其八曰當生變曜流年變星其九曰限併諸煞貴祿
不臨其十曰流年諸星無忽柔曜此十條者各有詳註未審如何
國師曰此十條之說亦末矣本之則無今學士談星根本以宮主
爲重耶度主爲重耶曰得於平昔之講明以宮度兼論不可用一
而廢一也國師笑曰宮度兼論吾恐子於星度胸中不能自斷何
以斷人之禍福耶且如命躔丑宮之牛度宮土度金限行遇火一
生一剋何以爲斷又如命坐寅宮尾火虎度木宮限行遇水一生
一剋何以爲斷於禍福何憑遂再進曰願棄所學而從師求教師
曰吾嘗以近世談星者言宮不知度言度不知宮二者胥失矣吾
於海上異人授我以偏正之垣於二十八宿之中分之曰一太陽
五太陰六木六土六水二火二金之說學士曾聞之乎曰未也國
師曰人生於地日月五行見於天其生值此七曜之吉則一生享
福安榮七曜之凶則一生忙迫百不如意日月五星其爲物也於

天地間最大於天下萬物日主晝月主夜乃天之眼目也在天有五星在地有五行人生在世五者一日不可缺觀星談命苟不知此本根則爲徒然學宮度兼論之術何以決人之禍福故十二宮有偏正之垣子宮以虛日鼠爲正垣鼠乃子垣之宮神非正垣而何也丑宮斗金牛寅宮尾火虎卯宮房日兔辰宮亢金龍巳宮翼火蛇午宮星日馬未宮鬼金羊申宮觜火猴酉宮昂日雞戌宮婁金狗亥宮室火豬皆本宮之正垣此乃千古不易之論此談星之大根本不可盡知要妙哉所謂一太陽者太陽君象也天無二日民無二王惟星日馬乃太陽之正垣太陰者后妃之象后妃嬪衆多宜太陰之有五也故以鬼金羊爲太陰之正垣其餘張心危畢月皆偏垣之月也六木者寅宮尾火虎亥宮室火豬爲木正垣其餘斗奎井角皆偏垣之木也六土者子宮虛日丑宮牛金爲土正垣其餘女氏胃柳皆偏垣也六水者巳宮翼火申宮觜火爲水之正垣其餘箕壁參軫水皆偏垣也二火者卯宮房日戌宮婁金爲

火之正垣二金者辰宮亢金酉宮昴日爲金之正垣天地之間水
木土隨遇而有隨所居而可得木滿山林土滿寰宇水滿江河隨
處皆有至於金火則不可多得焉只有二火二金使金火如木土
水之多則天下嘗有持刃縱火之患耳豈不爲世道憂吾有偏正
垣七政論并日月並明說計八篇又有二百字真經二十五題詳
於學士十條者學士所舉十條人常聞常知也吾之諸論其金火
人所未聞未知也今以授子子欲行之當誓於天地鬼神不可輕
泄此天機玄妙吾得海上異人所傳而未嘗泄今子得吾之傳若
不寶而重之必招譴於天不可逃也乃對師焚香設誓三日後國
師遂以諸論八篇與夫二百字真經二十五題授之百拜而寶之
大遼統和二年八月十三日耶律純自識

放懷詩自序

耶律孟簡

禽獸有哀樂之聲螻蟻有動靜之形在物猶然況於人乎然賢達
哀樂不在窮通禍福之間易曰樂天知命故不憂是以顏淵簞瓢

自得此知命而樂者也子雖流放以道自安又何疑耶

本傳

書

報皇太弟問軍前事書

大同元年

太宗

初以兵二十萬降杜重威張彥澤下鎮州及入汴視其官屬具員者省之當其才者任之司屬雖存官吏廢墮猶雛飛之後徒有空巢久經離亂一至於此所在盜賊屯結土功不息餽餉非時民不堪命河東尙未歸命西路酋帥亦相黨附夙夜以思制之之術惟推心庶僚和協軍情撫綏百姓三者而已今所歸順凡七十六處得戶一百九萬百一十八非汴州炎熱水土難居止得一年太平可指掌而致且改鎮州爲中京以備巡幸欲伐河東姑俟別圖其

概如此

遼太宗紀

責北漢主書

應祿十三年

穆宗

爾先人窮來歸我我先兄天授皇帝待以骨肉洎余繼統益修前好爾父卽世我用命爾卽位樞前丹青之約我無所負爾父據有

汾國七年止稱乾祐爾不遵先志輒肆改更李筠包藏禍心舍大就小無所顧慮姑爲覬覦軒然舉兵曾不我告段常爾父故吏本無大惡一旦誣害誅及其妻子婦言是聽非爾而誰我務敦大義曲容瑕垢父子之道所不忍渝爾宜率德改行毋自貽伊戚也資續

治通鑑
長編

移高麗書

統和十一年

聖宗

大朝統一四方其未歸附期於埽蕩速致降款毋涉淹留

東國通鑑

復宋誓書

統和十二年

聖宗

維統和二十二年歲次甲辰十二月庚辰朔十二日辛卯大契丹皇帝謹致書於大宋皇帝闕下共議戢兵復論通好兼承惠顧特示誓書以風土之宜助軍旅之費每歲以絹二十萬正銀一十萬兩更不差使臣專往北朝只令三司差人搬送至雄州交割沿邊州軍各守疆界兩地人戶不得交侵或有盜賊逋逃彼此無令停匿至於隴畝稼穡南北勿縱搔擾所有兩朝城池並可依舊存守

淘濠完葺一切如常卽不得創築城隍開掘河道誓書之外各無所求必務協同庶存悠久自此保安黎庶謹守封郵質於天地神祇告於宗廟社稷子孫共守傳之無窮有渝此盟不克享國昭昭天鑒當共殛之某雖不才敢遵此約謹告於天地誓之子孫苟渝此盟神明是殛專具諸述不宣

國志二十

致宋帝書

重熙十年

興宗

維契丹重熙十年歲次壬午二月弟大契丹皇帝謹致書於兄大宋皇帝闕下粵自世修歡契時遣使輶封圻殊兩國之名方冊紀一家之美蓋欲洽於縣遠固將有以披陳切緣馬橋關南是石晉所割迄今柴氏以代郭周興一時之狂謀掠十縣之故壤人神共怒廟社不延至於貴國祖先肇創基業尋與敝境繼爲善鄰暨乎太宗紹登寶位於有征之地才定并汾以無名之師直抵燕薊羽石精銳禦而獲退遂致移鎮國強兵富南北王府并內外諸軍彌年有成境之勞繼日備渝盟之事始終反覆前後諳詳嘗切口審

專命將臣平河右炎涼屢易勝負未聞兼李元昊於北朝久已稱藩累會尙主克保君臣之道實爲甥舅之親設罪合致討亦宜垂報邇者郭稹侍至杜防人回雖具音題而但虞詐謀已舉殘民之伐曾無忌器之嫌營築長堤填塞隘路開決塘水添置邊軍旣潛稔於猜嫌慮難敦於信睦倘或思久好共遣疑懷曷若以晉陽舊附之區關南元割之縣俱歸當國用康黎人如此則益深兄弟之懷長守子孫之計緬維英晤深達惻悰適居春陽善綏冲裕

回宋誓書

興宗

維重熙十一年歲次癸未八月壬申朔二十九日庚子弟契丹皇帝謹致書於兄大宋皇帝闕下來書云謹按景德元年十二月七日章聖皇帝與昭聖皇帝誓曰共遵誠信虔守歡盟以風土之儀物備軍旅之費用每歲以絹二十萬正銀一十萬兩更不差使臣專往北朝只令三司差人搬送至雄州交割沿邊州軍各守疆界兩地人戶不得交侵或有盜賊逃遁彼此勿令停匿至於隴畝稼